

Inatsisartut aalajangiiffigisassaattut siunnersuut Naalakkersuisut peqquneqarnissaat pillugu sulissutigeqqullugu erngup nukinganik nukissiorfiliornissaq Qasigiannnguanut aamma Aasiannut pilersuisussamik, aamma Nuup erngup nukinganik pilersorneqarnerata annertusineqarnissaanik, maleruagassat siunnersuutip aallaqqaataani tunngavilersuutitut nalunaarsorneqartut naapertorlugit aaqqissuunneqartussamik (Immikkoortut A-miit D-mut)

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

pillugu

Sanaartornermut Ataatsimiititaliap

siunnersuutip aappassaaneerreqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Pele Broberg, Partii Naleraq

Ulloq 3. oktober 2019-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Naalakkersuisut aalajangiiffigisassatut siunnersuummi peqquneqarput UKA2020-mut sulissutigeqqullugu erngup nukinganik nukissiorfiliornissaq Qasigiannnguanut aamma Aasiannut pilersuisussamik, aamma Nuup erngup nukinganik pilersorneqarnerata annertusineqarnissaanik sulissuteqaqqullugit. Siunnersuut ”Nukissiuuteqarnermut aamma Imerkik pilersuinermit immikkoortumi pilersaarut” aamma UKA2019/165-mik aallaaveqarpoq.

Tulliuttut siunnersuuteqarnermi piumasaqaataapput:

- kingusinnerpaamik UKA 2020-imi erngup nukinganik nukissiorfiliornissaq aamma erngup nukinganik nukissiorfinnik annertusaaneq pillugu siunnersuummik saqqummiussinissaq
- Illoqarfinni taakkunani pingasuni sanaartugassat ataatsimoortut sanaartugassat suliniutit ataatsimoortut sinneqartoofiusut.
- Naalackersuisut kingusinnerpaamik UKA 2020-mi siunnersuummik saqqummiussaqaassapput aningaasalersuinissamut, ingerlatsinissamut aamma piginnittuunissamut
- Naalackersuisut, erngup nukinganik nukissiorfiliassanut atatillugu ilutsip toqqarneqartup naammassineqarnissaanut sanaartornissamut, ingerlatsinissamut aamma aningaasalersuinissamut inatsisiliornissat pisariaqartut aallartissavaat.

Inuussutissarsiornermut, Nukissiuteqarnermut Ilisimatusarnermullu Naalackersuisumik ataatsimeeqateqarneq

Ulloq 13. september 2019-mi ataatsimiititaliaq siunnersuut pillugu Inuussutissarsiornermut, Nukissiuteqarnermut Ilisimatusarnermullu Naalackersuisumit saaffiginnissummik tigusaqarpoq, ataatsimiinneq ulloq 27. september 2019-mi ingerlanneqarpoq. Ataatsimiinnermi Naalackersuisoq ilaatigut oqarpoq erngup nukinganik nukissiorfiliorninnik sanaartorneq akisusoq, taamaammallu ukiorpassuarni innutaasunut aalajaatsumik amerlassusilinnut imaluunniit amerliartortunut tunisinikkut aningaasaliissutit utissasut.

Saaffiginnissut isumaliutissiisummut **ilanngussaq 1-tut** ilanngunneqarpoq.

Apeqqutit

Ataatsimiititaliaq Ataatsimiititaliap siunnersuummik suliaqarnissaanut *Inuussutissarsiornermut, Nukissiuteqarnermut Ilisimatusarnermullu Naalackersuisumut arlalinnik apeqquteqarpoq* ullorlu 3. november 2019-mi Nalaackersuisup akissuteqaataanik tigusaqarpoq. Ataatsimiititaliap apeqqutai *Naalackersuisunullu ilaasortap akissutai Isumaliutissiisummut ilanngussaq 2-tut* ilanngunneqarput.

Siunnersuutip ataatsimiititaliamit siullermeerneqarnera

Suleriaasissatut piunasaqaatit eqquutsinniarlugit Naalackersuisut suliniutit ataatsimoortinnissaat qinersimavaat, ”Inuiaqatigiinni aningaasaqarnermi kingunerisinnaasanik nalilersuinerit suliarinissaannut ilitersuutit”. Suleriaasissatut piunasaqaatit tulluuttut allassimapput:

”Pisortat aningaasaliissutaat aningaasaqarnikkut imminut akilersinnaasut, isumannaatsumillu ineriartornissamut ilapittuutaasussat sumiiffinni siunissaq

eqqarsaatigalugu inuussutissarsiutinik ineriartortitsiviusunut innuttaasullu amerliartorfiini ingerlanneqartassapput.”

Sanaartornermut Ataatsimiititaliap paasivaa, ilitsersuummi ”Inuiaqatigiinni aningaasaqarnermi kingunerisinnaasanik nalilersuinerit suliarinissaannut ilitsersuutit” sanaartugassatut suliniutit ataasiakkaarneqassanersut imaluunniit suliniutit arlalinngorlugit ataatsimoortunngortinneqarsinnaanersut.

Tamaattorli missingersuusiornermut kaajallaasitami ulloq 17. juni 2008-meersumi imm. 2.3, ima allassimavoq:

”Siunertaq aningaasaliissutitigut immikkoortutut soqutiginarutut isigineqaraangat konto pingaarneq pilersinneqartarpoq. Sanaartornermut kontot eqqarsaatigalugit sanaartornermi pilersaarutit ataasiakkaat aningaasaliiffigineqartarput.”

Sanaartornermut Ataatsimiititaliaq Naalakkersuisumut apeqquteqarpoq, Nalaakkersuisorlu ilaatigut akissummini allappoq inuiaqatigiinni aningaasaqarnermi kingunerisinnaasanik nalilersuinerit suliarinissaannut ilitsersuutini allassimasoq piumasaqaataasoq sanaartornermik aningaasaliissutaasumut siunertaq pingaarnertut isigalugu qaqutiguunngitsukkut suussusersineqartutut pisariaqartitsineri anguniagaasoq, , 2030-mi pisortat nukissiutinik pilersuinerat sapinngisamik siammasinnerpaamik nukissiutinik ataavartunik tunngaveqassasoq. Takuuk **ilannugsaq 2**. Naalakkersuisut akissuteqaatiminni isummerfigisimannngilaat: ”Sanaartornermut kontut eqqarsaatigalugit pilersaarutit ataasiakkaat aningaasaliiffigineqartarput.”

Aningaasaleeriaaseq sorlerluunniit qinerneqaraluarpat Qasigiannguani aamma Aasiaanni erngup nukinganik nukissiorfiliornissaq 1,4 mia. kr.-nirik naleqartussaavoq. Inuiaqatigiit aningaasarsiorneranni 217 mio. kr.-nirik naleqassaaq - tassa imaappoq inuiaqatigiinnut erngup nukinganik pilersorneqarnera 217 mio. kr.-nirik amigartooruteqarfiussalluni, maannakkut orsussanik nunap piinik imerpalasunik pilersuinerimik ingerlatsiinnarnermut taarsiullugu. Utoqqarmiut Kangerluarsunnguani erngup nukinganik nukissiorfiup annertusineqarnissaa 1,7 mia. kr.-nirik naleqartussaavoq illuatungaatiigulli 465 mio. kr.-nirik sinneqartoorfiussalluni. Aasianni Qasigiannguanilu ukiuni kingullerni innuttaasut amerliartunnginnerinik peqquteqartumik erngup nukinganik nukissiorfiornermit amigartoorutissat, Nuummi erngup nukinganik nukissiorfiup allilerneqarneranit, Nuummi innuttaasut amerliartorneranik nammanneqarsinnaavoq.

Qasigiannguani erngup nukissiorfiornermi amigartoorutaasussat illuatungilerniarlugit Naalakkersuisut Qasigiannguani aamma Aasiaanni erngup nukissiorfiliornissat aamma Nuummi erngup nukissiorfianik annertusaanissamik suliniutit ataatsimoortinneqarnissaat

qinersimavaat. Taamaaliornikkut erngup nukissiorfiliorfissat taakkua marluk ataatsimut aningaasaliiffigineqassapput katillugulu 248 mio. kr.-ninik sinneqartoorfiussapput.

Sanaartornermut Ataatsimiititaliap inuiaqatigiit aningaasaqarnerat eqqarsaatigalugu erngup nukissiorfiliornissat suliniutit ataatsimoortillugit aningaasaliiffigineqarnissaat suliniutigineqarnissaallu paasinartutut nalilerpaat, aningaasaliissutimmi ataatsimut isigalugit ukiut 22-it ingerlanerini ikummatissamik atuinermik ukiumut 545 mio. liiterinik sipaarfiusussaapput erngullu nukinganik pilersuineq orsussanik nunap piinik imerpalasunik atuinnermit akikinnerummat innaallagamik kiassarnermillu akinik appaanissamik malitseqartussaalluni.

Inaarutaasumik oqaatigineqassaaq Naalakkersuisut Qasigiannguani aamma Aasiaanni pilersuisussamik Qasigiannguani erngup nukissiorfiliornissaq aamma Nuummi erngup nukissiorfianik annertusaanissaq sulissutiginiarmassuk kingusinnerusukkullu suliniutissanik UKA2020-mi siunnersuuteqarniarmata.

Ataatsimiititaliap inassuteqaatai

Tamanna tunngavigalugu **Sanaartornermut Ataatsimiititaliami amerlanerussuteqartut Siumumeersut Demokraatineersullu** siunnersuutip Inatsisartuni akuersissutigineqarnissaa inassutigaa.

Sanaartornermut Ataatsimiititaliami ikinnerussuteqartut Partii Naleqqami ilaasortaatitap siunnersuutip itigartinneqarnissaa inassutigaa.


Sanaartornermut Ataatsimiititaliami ikinnerussuteqartut Inuit Ataqatigiit allannguutissatut siunnersuummut ataani allasimasumut ima oqaaseqassapput.

Takuuk ilanngusaq 3.


Sanaartornermut Ataatsimiititaliami ikinnerussuteqartut Inuit Ataqatigiit ima allannguutissatut siunnersuuteqartut:

Inatsisartut aalajangiiffigisassaattut siunnersuut Naalakkersuisut peqquneqarnissaat pillugu sulissutigeqqullugu erngup nukinganik nukissiorfiliornissaq Qasigiannguanut aamma Aasiannut pilersuisussamik, aamma Nuup erngup nukinganik pilersorneqarnerata annertusineqarnissaanik, kiisalu Qasigiannguani Aasiannilu erngup nukissiorfissaq aamma Nuummi erngup nukissiorfiata annertusineqarnissaata ataatsikkut sananeqarnissaanik, maleruagassat siunnersuutip aallaqqaataani tunngavilersuutitut nalunaarsorneqartut naapertorlugit aaqqissuunneqartussamik (immikkoortut A-miit D-mut)


Taama oqaaseqarluni isumaliutissiisummilu allassimasutut paasinnilluni matumuuna
ataatsimiititaliap siunnersuut aappassaaniigassanngortippaa.




Anders Olsen
Siulittaasoq




Aqqaluaq B. Egede
Siulittaasup tullia



Nikkulaat Jeremiassen



Justus Hansen



Pele Broberg



Inatsisartut Sanaartornermut Ataatsimiititaliaat

Uunga nassiussaq: inatsisartut@inatsisartut.gl

**Inatsisartut Sanaartornermut Ataatsimiititaliaata aamma
Inuussutissarsiornermut, Nukissiuuteqarnermut Ilisimatusarnermullu
Naalakkersuisup Jess Svane akornanni ataatsimiinnissamut qaaqqsussut**

12-09-2019
Sagsnr. 2019 - 10421

Inatsisartut 2019-imi ukiakkut ataatsimiingajalerput. Ataatsimiinneq sioqqullugu oqaluuserisassat ilaannik oqaloqatigiinnissamut Sanaartornermut Ataatsimiititaliaq qaaqorusuppara. Ilaatigut uku oqaluuserisassat eqqartueqatigiiffigisinnaaneri nuannaarutigissavakka:

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Ukiami ataatsimiinnermi imm. 61:

"Qitiusumik kiassaateqarfinnik kissarsuuteqarfinnillu Namminersorlutik Oqartussanit toqqaannangitsumik toqqaannartumilluunniit pigineqartunik atuisinnaanerup Nukissiorfinnut kingusinnerpaamik 1. januar 2020-mi tunniunneqar-nissaanik qulakkeerineqqullugit Naalakkersuisut peqquneqarnissaannik Inat-sisartut aalajangiiffigisassaattut siunnersuut. Atuisinnaanerup nuunneqarnera ilutigalugu kiassaateqarfinni aningaasat uninngasuutit Nukissiorfinnut nuunne-qassapput. Atuisinnaanerup nuunneqarnerani atorulersuutit aserfallatsaaline-qarnissaannut pisussaaffiit atuuttut allanngortinneqassanngillat atorulersuutillu piumasaqaatit Naalakkersuisunit aalajangersarneqartut naapertorlugit aserfallatsaalineqartussaassapput."

Ukiami ataatsimiinnermi imm. 153:

"Inatsisartut aalajangiiffigisassaattut siunnersuut Naalakkersuisut peqquneqar-nissaat pillugu sulissutigeqqullugu erngup nukinganik iluaquteqarluni nukissior-filiornissaq Qasigiannuanut aamma Aasiannut pilersuisussamik, aamma Nuup erngup nukinganik iluaquteqarluni pilersorneqarnerata annertusineqarnissaa-nik, maleruagassat siunnersuutip aallaqqaataani tungavilersuutitut nalunaar-sorneqartut naapertorlugit aqqissuunneqartussamik (Imm. A-miit D-mut)."

Taamaattumik nuannaarutigissavara Sanaartornermut Ataatsimiititaliaq siuliani pineqartoq pillugu ataatsimeeqatigisinnaagukku, ullormi piffissamilu ataatsimiititaliamut pitsaanerusumi. Taamaassappat siunnersuutigissavara ataatsimeeqatigiinnissaq ingerlanneqassasoq nal. 11:00-ip aamma 13:00 -ip akornanni Inuussutissarsiornermut, Nukissiuuteqarnermut Ilisimatusarnermullu Naalakkersuisoqarfimmi, ataatsimiinnermullu atatillugu ullup qeqqasiortitsisoqarumaarpoq.

Inussiarnersumik inuulluaqqusillunga


Jess Svane



Inatsisartut Sanaartornermut Ataatsimiititaliaat

E-mailikkut uunga nassiussaq: Inatsisartut@inatsisartut.gl

**UKA2019/153-imut tunngatillugu Sanaartornermut Ataatsimiititaliamit
apeqqutinik akissutit**

02-11-2019
Sagsnr. 2019 - 17215

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

UKA2019/153-imut, Inatsisartut aalajangiiffigisassaattut siunnersuut Naalakkersuisut peqquneqarnissaat pillugu sulissutigeqqullugu erngup nukinganik iluaquteqarluni nukissiorfiliornissaq Qasigiannuanut aamma Aasiannut pilersuisussamik, aamma Nuup erngup nukinganik iluaquteqarluni pilersorneqarnerata annertusineqarnissaanik tunngasunik Sanaartornermut Ataatsimiititaliap qulaajaassutissanik arlalinnik apeqquteqarsimavoq. Apeqqutit ataani akissuteqarfigineqarput.

- 1. Naalakkersuisut qinnuigineqassapput suliniutit marluk
ataatsimoortinniarneqarnerat missingersuusiornermut
kaajallaasitami allassimasunut naapertuunnersut
isummerfigeqqullugit.**

Akissut:

Inuiaqatigiinni aningaasaqarnermi kingunerisinnaasanik nalilersuinerit suliarinissaannut ilitersuutini allassimavoq sanaartornermik aningaasaliissutaasumut siunertaq pingaarnertut isigalugu qaqutiguunngitsukkut suussusersineqartutut pisariaqartitsineri, pitsaanerusement atugarissaarnissaq pillugu periusissialikkatut anguniakkami, imaluunniit taakku marluk kattunnerisigut tunngavilersuutaasartoq.

Aammattaaq inuiaqatigiinni aningaasaqarnikkut kingunerisinnaasanik nalilersuinerup pitsaasup suliniutip sunniutaanik – iluaqutaasunik ajoqutaasunillu – erseqqissumik takussutissamik tunniussisarnera allassimavoq. Inernerisag siullertut pingaarnertullu naalakkersuinikkut pingaarneriunerimi ataatsimut aalajangiiffigisassatut tunngavigisamut ilalersuisinnaavoq.

Aamma ilaatigut suliniutini ataasiakkaani kingunerisinnaasanik nalilersuinissamut, ilaatigullu aningaasaliinissamut periarfissanik

assigiinnigitsunik assersuussinissamat ilusilersukkatut aqquteqartarnissap pisariaqartinnera allassimavoq.

Inuiaqatigiinni aningaasaqarnikkut suliuniummik nalilersuinermi saqqummiunneqartumi erngup nukinganik nukissiornissamik suliniutit taakku marluk tamaasa immikkoortillugit Naalackersuisut najoqqutassaaitamik naatsorsuiffigisimavaat. Taamaalilluni suliniutinut taakkununnga marlunnut tamanut immikkoortitamik inernerisatq atatitaq takuneqarsinnaavoq, taamaalilluni naalackersuinermi pingaarnersiunermit atugassamik aalajangiiffigisassatut tunngavigisami tamanna tamakkiisumik paasisitsissutaasimalluni.

Qulaani pineqartutut sanaartornermut aningaasaliissuteqarnermut siunertaq pingaarnertut isigalugu qaqutiguunngitsukkat suussusersisatut pisariaqartitsinermit tunngaveqarajuttassaaq. Aalajangiiffigisassatut siunnersuummi suussusersineqartutut pingaarnertut pisariaqartitaq Nukissiuuteqarnermut Imermillu pilersuinermit Immikkoortumut pilersaarutip 2030-mi pisortat nukissiuutinik pilersuinerat sapinngisamik siamasinnerpaamik nukissiuutinik ataavartunik tunngaveqarssanera pillugu anguniagaani takuneqarsinnaavoq. Qasigiannuani, Aasianni aamma Nuummi ikummatissanik uumassusilinnik pilereqartunik atuiunnaariartortitsineq pisortat nukissiuutinik pilersuineranni nukissiuutinik ataavartunik atuinerup annertussusia 70 %-it missaannit 90 %-it missaannut annertusisissavaa.

Taamaattumik erngup nukinganik nukissiornissamik suliniutit taakku marluk pisariaqartitaq suussusersisap ataatsip angunissaannut ilalersuisuunerat Naalackersuisut naliliissutigaa, taamaattumillu suliniutit ataasiinnaasutut isiginissaat naammaginartutut isigineqarpoq.

Inuiaqatigiinni aningaasaqarnikkut suliniutinik nalilersuineq aamma tassaavoq naalackersuinermi pingaarnersiunermit ingerlassamat sakkussaq, suliniutillu qanoq najoqqutassialimmik Aningaasanut Inatsimmut ilanngussarinissaannut isummersortuunngilaq. Tassunga atatillugu suliniutinik suliap ingerlateqqinnissaa pillugu aalajangiiffigisassatut siunnersuut akuersissutigineqassappat aningaasaliinissamat il.il. siunnersuummik Naalackersuisut kingusinnerpaamik UKA2020-mut saqqummiussisussaanagerat oqaatigineqassaaq. Ilisimaneqartutut ilusaasinnaasut arfinillit taakkartuutaasimapput.

- 2. Innutaasunut aalajaatsumik amerlassusilinnut imaluunniit amerliartortunut tunisinikkut aningaasaliissutit utissasut Naalackersuisup ataatsimiititaliamik ataatsimeeqateqarnermini**

ilisimatitsissutigivaa. Kalaallit Nunaanni Naatsorsueqqissaartarfiup kisitsisaataata takutippaat kalaallit innuttaasut ikiliartortut. Nuna qimallugu nuuttartut amerlasut kisitsisit aamma takutippaat, inunngortartullu amerlanerinnaannik kisitsit qaffasissutut isikkoqartut. Taamaattoqarnera aningaasaliinissamut tunngavissamut qanoq sunniuteqassava?

Akissut:

Inuiaqatigiinni aningaasaqarnermi naatsorsuutini innuttaasut siunissami amerlassusissaannut inissiinerit, Qasigiannguani, Aasianni aamma Nuummi oqaluttuarisaanermi allanngoriartormik tunngaveqartut atorneqarsimapput. Iluseq taanna allanngussappat inuiaqatigiinni aningaasaqarnermi kingunerisamik tamatuma sunniuteqarnissaa erseqqissuuvoq. Sumiiffinni taakkunani pingasuni innuttaasut ikileriarnersa suliniutinut inuiaqatigiinni aningaasaqarnikkut iluanaarutissaq ajortisassavaat.

Nuummi innuttaasut siunissamut tunngatillugu ukiumut 1,5 %-inik amerleriarnissaat tunngavigitinneqarpoq. Tamanna manna tikillugu innuttaasut allanngoriartormerinit naleqqiullugu tutsuiginartutut naatsorsuutigisatut nalilerneqarpoq, apeqqutaatinnagu nunami tamarmi innuttaasut allanngoriartormerat qanoq issanersoq.

Qasigiannguani Aasiannilu innuttaasut allanngoriartormerinit tunngatillugu ukiuni ilaanni innuttaasut allanngoriartormerannik tunngaveqarluni tamanna nalilersuinerup nalaani aalaakkaasuussasoq tunngavigitinneqarpoq. Taamatuttaaq Qaasuitsup Kommuniata kommuninut nutaanut marlunnut immikkoortinneranik isiginnilluni tamanna tutsuiginartutut naatsorsuutigisatut nalilersorneqarpoq. Kommune Qeqertallup pilersinnerata nassataraa kommunalbestyrelse nutaaq namminersortorlu, borgmesteri aamma aqutsisoqarfik il.il. pilersinneqarneri. Aaqqissuussinikkut allanngortiterineq taanna nunap immikkoortuani ineriartortitsinissamik piukkunnaataanik ilorraap tungaanut nukittorsaassasoq nalilersuutigineqarpoq.

- 3. UPA2019/165-mi aalajangiiffigisassatut siunnersuut pineqartillugu, Aasianni aamma Qasigiannguani immikkut erngup nukissiorfiliortoqarsinnaanersoq aalajangiiffigisassatut siunnersuummi tunngavissiinersoq ujartorneqarpoq. Suliniutit immikkoortutut marluttut ingerlannagit ataatsimoortillugit suliariniarneqarpata suut pitsaaqutaassappat suullu ajoqutaassappat?**

Akissut:

Inuiaqatigiinni aningaasaqarnermi kingunerisinnaasanik naatsorsuutit tunngavigalugit Qasigiannugit aamma Aasiaat pilersornissaannut erngup nukinganik nukissiorfiliorneq suliniummut killup tungaanut sammivilimmik ullutsinnik naleqassutsimik tamaviaarfissaqassaaq. Nuummili erngup nukinganik nukissiornermik pilersuinerup annertusarnissaanut inuiaqatigiinni aningaasaqarnermik naatsorsuutit inuiaqatigiinni aningaasaqarnikkut annertuumik iluanaarfiussasoq takutippaat.

Tamatuminnga tunngaveqarluni suliniutit ataasiakkaat taakku marluk kattunneqarsinnaapput, taamaattumillu aningaasaliinertut ataatsimoortitatut isigineqarlutik. Nuummi allisaqarnermit sinneqartoorut Qasigiannugit aamma Aasiaat eqqaanni erngup nukinganik nukissiorfiliorneq amigartoorutip ilaanik aningaasaliinermut atorneqarsinnaavoq. Nuummi allisaqarnermi ilorraap tungaanut aningaasat takkussuuttut Qasigiannugani aamma Aasianni erngup nukinganik nukissiorfik tapersorsorsinnaavaat. Taamaalilluni iluaqutaasoq tassaavoq suliniutit taakku marluk ataatsimoortillugit pitsaasumik aningaasaliissutaanerat.

Suliniutit ataatsimoortitatut suliniutit isiginngikkaanni ajoqutaasoq annertoq tassaavoq 2030-mi pisortat nukissiuutinik pilersuinerat sapinngisamik siamasinnerpaamik nukissiuutinik ataavartunik tunngaveqarnissaannik nukissiornermut immikkoortumut pilersaarutip anguniagaanik sanioqqutitsineq. Ikummatissanit uumassusilinnit pilerfeqartunit nukissiornermut ataavartumut minguitsumullu nuunneq pingaartuavoq, Kalaallit Nunaat piinnarnagu, nunarsuarmulli tamarmut. Tamanna ilaatigut piujuartitsisumik ineriartortitsinissaq pillugu Naalagaaffiit Peqatigiit nunarsuarmut anguniagarisaani takuneqarsinnaavoq. Minguitsumut nuussinissamik pingaarnersiuneq Naalagaaffiit Peqatigiit piujuartitsinissamut nunarsuarmut anguniagaanni nukissiuutinut piujuartitsisunut tunngasumik normu 7-imi, suliffissuaqarfinnik, nutaaliornermut attaveqarfinnullu piujuartitsisunut tunngasumik normu 9-mi, kiisalu silap pissusaanik iliuuserisat pillugit normu 13-imi toqqaannartumik takuneqarsinnaapput.

4. Suliniutit immikkoortutut marluttut ingerlanneqassappata pitsaaqutit suuppat ajoqutillu suuppat?

Akissut:

Apeqqutip 3-p akissutiginera takugiuk.

5. Aasianni aamma Qasigiannugani ataatsimoorussamik erngup nukissiorfissaq kiisalu Nuummi erngup nukissiorfissaq

**ataatsimoortinnagit avissaartillugit pilersaarusiornissaq
Nalakkersuisut ammaffigaat?**

Akissut:

Inatsisartut aalajangiussassaannut sanaartornissamik suliniutit naammassinissaat Naalakkersuisut soorunami ammaffigaat.

Taamaattorli 2030-mi pisortat nukissiuutinik pilersuinerat sapinngisamik siamasinnerpaamik nukissiuutinik ataavartunik tunngaveqarnissaa pillugu anguniagaq Naalakkersuisut ima pingaartigisutut isigaat suliniutit taakku marluk naammassinissaat Naalakkersuisut inassutigalugu.

Nuummi allisaqarneq naammassineqassanngippat Nuummi innuttaasunut aamma inuussutissarsiorfinnut nukissiuutinik pilersuineq akisunerulerlunilu mingutsitsinerulissaaq, taamaattoqarnerani inuit uuliatortutut kissarsuutaat attanneqaannassammata, aammalu pisortat nukissiuutinik pilersuinerat ikummatissanik uumassusilinnit pilerfeqartunik tunngaveqartoq sanaartorfigineqassammat.

Qasigiannugit aamma Aasiaat eqqaanni erngup nukinganik nukissiorinnissamik suliniut kisimiitillugu naammassineqassappat Qasigiannugit aamma Aasiaat eqqaanni erngup nukinganik nukissiorfimmuut atasutut amigaartoorutitik Nuummi erngup nukinganik nukissiorfiup allineqarneranit sinneqartoorutit aningaasalersuinissamut ilalersuisinnaaneratigut iluaqutissartaq pigineqassanngilaq. Aningaasaliinissaq taanna allatut iluseqartumik nassaariniarneqartariaqassaaq.

**6. Inuiaqatigiit aningaasaqarnerannut tunngatillugu nalilersuinissaq
ukiunut 22-inut inissinneqarneranut suna tunngaviua?**

Akissut:

Taama annertutigisunik inuiaqatigiinnut tunngasunik aningaasaliinerit piviusunnngortikkaanni siviisuallaamik isertitsinissamut piffissamik toqqaassannginneq pingaartutut nalilernerqarmat piffissaq nalilersuiffissaq ukiunik 22-nik siviisussusilik toqqaarneqarpoq. Allaat mianersuussatut tunngavigisat atortillugit naatsorsuinermi inernerisat aalaakkaasussaammata tamanna pingaarluinnarpoq.

Aamma ukiut 20-t toqqaarneqarsimasinnaagalarput, suliniutilli illoqarfinni arlalinni naammssineqassammata, tassuunakkullu katitigaassusaat annertusissammata tamakku sianiginarlugit ukiunik 22-nik siviisussusilimmik piffissaq toqqaarneqarpoq.

7. **Erngup nukissiorfissat pineqartut tamarmik ukiunut 22-inut akilersinnaassusiat kisiat misissornagu aamma erngup nukissiorfissai tamarmik immikkut ukiunut 30-nut naatsorsukkamik akilersinnaassusiat misissuiffigineqassasoq Naalackersuisut ammaffigaat?**

Akissut:

Soorunami kissaatigineqartunik naatsorsuinernik naammassisaqarnissaminnut Naalackersuisut ammapput. Taamatut sivilisunerusumik nalilersuinermit piffissaq erngup nukinganik nukissiornissamik suliniutinit inuiaqatigiinni aningaasaqarnikkut iluanaarutaasussamik pitsanngorsaansissaa imaliallaannaq nalilersuutaavoq. Taammaattoq maannamut naatsorsuinerugallarnert aallaavigalugit takutippaat, Qasigiannguani /Aasiannilu maannamut naligi iluanaarutaanngitsumiissasut, Nuummilu imeqarfimmit annertusineq suli iluanaaruteqarfimmiissasoq. 1990-ik aallartinneranni Utoqqarmiut Kangerluarsorusinnguit nukissiorfeqalernissaanut aalajangiisoqarmat, assigusumik nunatsinni aningaasaqarnikkut ukiuni 20-ni nalilersuinerit malillugit pippat.

Taamaattorli mianersuussatut naatsorsuuteqarnermut tunngavigisat aalaakkaasut aallaavigalugit suliniutit naammassinissaat pillugu aalajangiussaqaarnissaq Naalackersuisut assut inassutigerusuppaat, taamatuttaarlu ukiunik 22-nik sivilisussuseqartumik nalilersuinermit piffissamik attassinissaq inassutigerusullugu. Piffissaq taanna qaangerlugu tunngavigisat iliuuserineqarfigisimasat arlallit pioreersutut nalornissuteqarneq – siumut inissii nut tamanut atuuttoq – malunnartumik annertusassavaa. Taamaattumik tunngavigineqartumut naleqqiullugu naatsorsuinermit inernerisat ilorraap tungaanuunerusumut inissinniarsarineqarnerattut ukiunut 30-nut sivitsuineq paasineqarsinnaavoq.

Maannakkut aalajangiinissamut siunnersuutip naatsorsuinermit inernerisai suliniutit taakku marluk piviusunngortinnissaannut suliap nangeqqinnissaannut aalajangiiffigisassatut siunnersuummik aalajangiisoqartariaqaraluartoq aalaakkaasuunerat Naalackersuisut nalilersuutigaat.

8. **Inuiaqatigiit aningaasaqarnerannut tunngatillugu sivitsuilluni nalilersuinissaq ukiunut 30-inut inissinneqarpat qanoq kinguneqarsinnaava?**

Akissut:


Apeqput 7-imut akissut takugiuk.

9. Inatsisissap UKA2020-mut saqqummiunneqarnissaa siunertaanerluni?

Akissut:

Inatsisinik katersanik kingusinnerpaamik UKA2020-mi saqqummiussaqaarnissaminnik Naalakkersuisut siunertaqarput.

Inussiarnersumik inuulluaqqusillunga

Jess Svane


ILANNGUSSAQ 3

Najattaq Mathiassen

Fra: Aqqaluaq Egede
Sendt: 8. november 2019 18:46
Til: Najattaq Mathiassen
Emne: Fwd: erngup nukissioffissat pillugit allannguutissatut siunnersuut
Vedhæftede filer: erngup nukissioffissat pillugit allannguutissatut siunnersuut.docx; ATT00001.htm

Sendt fra min iphone

Start på videresendt besked:

Fra: Najattaq Mathiassen <NAMMA@inatsisartut.gl>
Dato: 8. november 2019 kl. 18.44.39 GMT-3
Til: Aqqaluaq Egede <AQQQE@inatsisartut.gl>
Emne: erngup nukissioffissat pillugit allannguutissatut siunnersuut

Erngup nukissiorfissaq Nuummi aamma Qasigianguani Aasiannilu ataatsimoorussamik erngup nukissiorfeqalæernissaa tamaasa isumaqatigaagut. Aporfigaarput Naalakkersuisut Nukissiorfiit ingerlatseqatigiiffittut A/S-itut ingerlasunngortinneqarumaarnissaa anguniakkanut periarfissanut ilanngummassuk. Qulakkeerniarsimasarput tassaavoq suliassaq imaalissanngitsoq, tassalu, Nuummi erngup Nukissiorfiliortoqarpat aatsaat sanaartugaq atulereeruni missingersuutit malillugit aatsaat ukiut 22-it qaangiuppata iluanaarutaalersussat tunngavigalugit Qasigianguani Aasiannilu erngup nukissiorfiliassaq aallartissanersoq. Naalakkersuisup paasisutissippaatigut Qasigianguani Aasiannilu erngup nukissiorfissaa tupinnaraluartumik imminut akilersinnaanngitsuusoq ilisimatitsimmat.

Inuit Ataqtigiiit kissaateqarsimagaluarpugut apeqquteqarlutalu akilersinnaassutsimik misissuinerit ukiunut 30-inut inissillugu sivitsorneqassasoq, taamaalisoqassappallu suliniut imminut akilersinnaalissanersoq. Uagut Inuit Ataqtigiinni isumarput malillugu soorunami Qasigianguani Aasiannilu erngup nukissiorfeqalernissaa imminut akilersinnaassasoq nalunngilarput. Naalakkersuisoq piumaffigaarput, neriorsuivorlu nunatta avataanut nukissiorfinni atugassatsinnik orsussamik pisiniartarnitsinnut aningaasat aniatittakkatta annertussusaat ataatsimiitaliamut paasisutissiisutigineqassasoq. Naalakkersuisulli pineqartup suliassaq tamanna neriorsuutigisani naamassinngilaa.

Qulakkeerusutatsinnut ilaavoq assersuutigalugu Nuummi erngup nukinganik nukissiorfiliortoqarpat, piffissallu ingerlanerani Nukissiorfiit A/S-itut ingerlasunngortitaalluni, taava imaalissanersoq ingerlartseqatigiiffik A/S-itut ingerlatsisoq Qasigianguani aamma Aasianni erngup nukinganik nukissiorfiliassamat sanaartoqqullugu piumaffigineqarsinnaajunnaarluni avannaani erngup nukissiorfissaq piviusunngunngitsuussamat. Inatsisit malillugit ingerlatseqatigiiffik A/S-itut ingerlasoq aningaasaqarnikkut pisussaaffilersussallugu imaaliillaanngassaanngilaa. Ajornarsimanngitsuuppammi sooq massakkut Naalakkersuisut ingerlatseqatigiiffinnut A/S-itut ingerlasunut piumasaqaateqaqqullugit Inatsisartunit piumaffigineqaraangamik iliuuseqanngisaannarput. Tamanna takussutissaavoq A/S-inngortitavut tamarmik politikikkut siunnerfinnik kissaatigineqartunillu qaqtiguinnaq iluatsitsiviusarnerannik.

Taamaattumik Inuit Ataqtigiiit siunnersuummi tamanit paaseqtigiittoqarnissaa siunertaralugu matumuuna **allannguutissamik siunnersuummik imaattumik saqqummiussissaagut:**

Uunga siunnersuut: Inatsisartut aalajangiiffigisassaattut siunnersuut Naalakkersuisut peqquneqarnissaat pillugu sulissutigeqqullugu erngup nukinganik nukissiorfiliornissaq Qasigianguanut aamma Aasiannut pilersuisussamik, aamma Nuup erngup nukinganik pilersorneqarnerata annertusineqarnissaanik, kiisalu Qasigianguani Aasiannilu erngup nukissiorfissaq aamma Nuummi erngup nukissiorfiata annertusineqarnissaata ataatsikkut sananeqarnissaannik, maleruagassat siunnersuutip aallaqqaataani tunngavilersuutitut nalunaarsorneqartut naapertorlugit aaqqissuunneqartussamik (immikkoortut A-miit D-mut)

Inuit Ataqtigiiit allannguutissatut siunnersuuteqarnitsigut qulakkeerumavarput Qasigianguani aamma Aasianni ataatsimoorussamik erngup nukissiorfissap suliarineqarnissaa kinguarsarneqassanngitsoq.

Imaassanngilarmi aatsaat Nuummi erngup nukissiorfiortiata annertusineqarnerata kingorna aningaasartuutit imminut akilereernerpata iluanaarutininik pissarsianik, tassa ukiut 22-it qaangiuppata aatsaat Qasigiannguani Aasiannilu erngup nukissiorfiliassaq sananiarneqalissasoq. Qasigiannguit aamma Aasiaat erngup nukissiorfissaat, kiisalu Nuummi erngup nukissiorfiup pilersuisinnaanerata annertusarneqarnissaa ataatsikkut sananeqarnissaat Inuit Ataqatigiit siunnersuutigaarput. Qasigiannguani aamma Aasianni erngup nukissiorfissaa pingaaruteqarmat pisariaqarmallu. Nunatsinni erngup nukinganik nukissiuuteqarneq annertusarneqassaaq. Pisariaqarpoq siuarsaasariaqarpugullu. Naaperiassutitut allannguutissatut siunnersuuteqarpugut siunnersuutaqqaartup qulequtaa allanngortippallaarnaveersaarlugu. Qulakkeerniaannarparput Qasigiannguit aamma Aasiaat erngup nukinganik nukissiuuteqalernissaat kinguarsarnagu piffissalersuineri ilaatillugu suliarineqarnissaa.